

darsulves und synem godishus eyndrechtliken mit enander fruntliken vorgan und vordragen uns ok mit on in craft desses breves, also dat wy unse nakomelinge ertzbischof und godishus to Magdeborch de vorenant abbet und godishus to Berge in orer were rechticheid und egendum, de se an den achte wisschepeln und oren tobehoringen wente nochgehad hebben und ok, als wy vor der underwiset sint und derfaren hebben, noch roweliken daran hebben, to ewigen tyden roweliken darby laten und beholden scullen und willen und se daran vortmer nicht hindern ieningleye wis ane geverde. Weret ok dat wy in vortyden de sulven achte wisschepele iemande gelegen hedden de lynughe schal machtlos und dem sulven abbete und synem godishus schadelos wesen. Des to orkunde hebbe wy unser ingesegel witliken hengen laten an dessen breff, darby sint gewest de vorsichtigen unse leven andechtigen duchtigen und getruwen er Hinric Louwingh canonic to Magdeborch, er Iohann Pulle monik to Berge, Iohannes von Sygelhorst unse scriver und Degenerd van Ekendorp unse voged to Wansleve, dar to to tugen geeschet. Gegeven na godis gebord verteynhundert iar dar na in dem achteynden iare in sunte Andree dage des hilgen apostolen.

*Original im Staatsarchiv zu Magdeburg s. r. Kloster-Bergische Stiftung 75. Abschrift im Privilegienbuche S. 177—179 mit der Ueberschrift: Haldingestorp de decima Gunteri episcopi. cap. H XVII.*

1419, Januar 31.

261.

*Heinrich, Abt zu Berge, beurkundet den Verkauf eines freien Hofes in Buckau seitens des Klosters an Hans Vorde für 36 Rheinische Gulden.*

Wy Hinrick van godesgnaden abbet to Berge vor Magdeburg bekennen in dysseme apene brive fur allen luden de on sehn horen edder lesen, dat ern Hinrick Schowe unse olde herr und unse capitele gemeyne vorkoft hebben oren fryen hof to Buckow dem bescheydene manne Hanse Vorden und Tralen siner eliken husfrowen vor ses und drittich guder Rynsche gulden, de he on ful und al nach willen wol betalt heft und se de vordan gekart hebben in unses godeshuses nut und frome. Dysses genanten hoves schal und wil disse vorbenomede Hans Vorde, Trale sine elike husfrowe gebuken midt allerley fryheit gemakes und tobehoryng an huse und an have als he rede begrepen is, also dat se schotens wakens herendynstes burdinges und alles burrechtes schullen syn fry ledich und los. Weret sake dat se den genanten hof wolden verkopen, so schal und wil unse capittel des yrsten kopes mechtig sin und redelik ghelt als on eyn ander betalen wolde und unse capittel den hofvortan fry to beholdenn als vorschreven steyt. Schege over dat se den hof anders wem verkofen wan unse capittel, de on gekoft heft, edder van erves wegen, eft se beyde gynnige erven